





16000

Uf. 4276



Uf 4276 a-f



#  
D. O. M. F.

XIV

# LIVONIA IN SACRIS CONSIDE-

RATA;

A PRAESIDE

M. HERMANNO *Becker*

Lemsalia prope Rigam Livono,

&

RESPONDENTE


CHRISTIANO BRAUNSCHVIGIO,

Belgardia Pomerano,

*Ad constitutum diem 22. Maji,*

ANNO Christi 1700.

publice proponetur.



VITEMBERGAE,

Typis MARTINI SCHULZI, Acad. Typogr.



Ex  
Biblioth. Regia  
Berolinensi.

1306991

## Prooemium.

**Q**uanta sit jucunditatis, quantaque insuper utilitatis, historiam PATRIÆ habere perspectam, atque bene cognitam, satis dici non potest. Hanc enim cuivis Patriæ amanti, quo ei officia sua, sive in sacra, sive civili Republica, utilia aequè ac grata olim præstare possit, utilem non minus quam scitu necessariam esse, nemo inficias ibit. Et hæc est causa, quam obrem hoc ipsum multis verborum lenociniis, multisque rerum argumentis evincere, supervacaneum censeam. Studium quippe historicum, quod salubris instar fontis limpidas aquas fundit, sive, ut Plinium imitari liceat, limpidine exoptata scatet, ex se jucundum & utile esse, inter omnes constat. Quare nihil attinet mirari, cur tot Imperatores, Reges, Principes, Comites, Nobiles, aliique maximam partem summae dignitatis Viri, omne vitæ curriculum in studio & cultu rerum historicarum extra-xerint, atque earum quasi amore deperierint, & etiam-num deperiant. Testantur hoc de argumento serae posteritati consecrata scripta *Conringii*, *Boeckleri*, *Schefferi*, *Lot-cenii*, *Rudbeckii*, *Morhoffii* aliorumque. Hæc omnia is, cui historia Patriæ, aliarumque regionum, & Ecclesiastica, & Civilis, est curæ cordique, mature perpendit, & pruden-ter animo secum recolit. Nullum enim est dubium, quin majus in Patriam commodum redundet, si quis ei ope-ram daturus, illius res gestas aliqua ex parte novit. Hoc ipso & temporum, & rerum conversiones majori cum fructu



fructu in memoriam revocantur, ex iisque ea, quae ad vitam, moresque emendandos pertinent, haud dubie sperantur. Id ipsum ubi semel iterumque animo mecum reputavi, unam alteramque de LIVONIA Patria mea dulcissima, Patronorum consilio atque instinctu, Dissertationem conscribere apud me constitui. Equidem me non fugit, scriptores multos de eadem hodiernum reperiri, legique. Sed cum illorum copia propter Exemplarium inopiam, rarior indies fiat, multi vero accuratiorem rerum Livonicarum cognitionem efflagitent, & mihi praeterea, ad hanc rem auctor sit SCHURZFLEISCHUS, cujus colloquio & consuetudine hic fruor, ut post diuturnum deliberandi spatium, non nihil de rebus Livonicis mandare literis auserim. Dolendum autem, me subsidia, quae ad commentationes meas Livonicas facere omnino videntur, ob communem Patriae calamitatem belli, domo obtinere non posse. Quare L. B. oratum Te majorem in modum cupio, ut, si quae desunt forsitan & jure desiderantur, pro benignitate Tua supplere ne graveris. Et cum non desperem, Te levi hoc scripturae genere, & personis summorum virorum haud digno contentum fore, polliceor Tibi quovis tempore prompta studia, & inserviendi conatum. Ut autem ordo serveretur, totum praesens negotium de SACRIS LIVONORUM ita parti placet, ut tria capita constituentur, quorum primum ager de impio Livonorum veterum cultu, alterum de religionis cultu, in Ecclesia Romana recepto, tertium denique de renovato & instaurato per D. Lutherum cultu.

## CAP. I.

## CAP. I.

De

## Impio Livonorum veterum cultu.

§. 1.

**I**omines a vera Religione alienos, immensum prope idolorum numerum constituisse, illaque cultu divino prosequi consuevisse, tantoque Deos suos ardore coluisse, ut, si quandoque officii sui fuissent negligentiores, religioni duxerint, Scriptores memoriae prodiderunt. Id quod *August. de Civ. Dei. lib. XVIII. cap. 18. conf. lib. 7. cap. 2* suo jam tempore affirmavit, numerata simulacra fuisse tricies sexies mille. Et antiquissimus Poetarum fere, *Hesiodus* jam cecinit. *Εργ. α. p. m. 30.*

*Τῆς γὰρ μύριοι εἰσὶν ἐπὶ τοῦ πάλαι ποτε ἱεροῦ.*

Idem quoque asserit *Varro*, & ex hoc *Alexander ab Alexandro Lib. 6. Genial. dier. Cap. 4. pag. 436.*

§. 2.

Quemadmodum autem homines non Christiani, multa idola sibi excogitarunt, & pravo quodam ingenii lusu, ac mentis cœcitate certa iisdem loca assignarunt, quo eo melius & conservarentur, & religiose colerentur: ita quoque Diis suis infinita fana magnis sumptibus extruxerunt, & altaria numerum fere excedentia erexerunt. Ecquem latet, quam praeclarum fuerit templum APOLLINIS DELPHIS, in monte Parnasso positum, in rupe undique impendente, de quo *vid. Justin. lib. 24. Cap. 6. p. m. 287. Conf. Diodorus Siculus Lib. 16. pag. 428. Rhodigin. lib. 16. Cap. 19. Edit. Wechel.* Parimodo templum JOVIS HAMMONIS magno in pretio fuit, quodq; *Plutarcho* auctore, in Lybia apud Garamantas trans Cyrenas in sylva quadam truculenta, loco arido



sterilique fuit situm, atque visum. *Leg. Curtius lib. IV. Cap. 7. p. m. 104. it. 106. conf. Cap. 13. p. 130.* Cum primis autem prae reliquis templum DIANAE Ephesi valde excelluit, quod adeo magnifice fuit aedificatum, ut inter septem mundi miracula fuerit connumeratum. Et universam Asiam templo huic exstruendo ducentos & viginti annos impendisse, *Plinius scribit, Natur. Hist. lib. 36. C. 14. p. 506.* De altaribus Gentium a vero DEO remotarum constat, quod tantum eorum numerum habuerint, ut Athenienses *ὅσω ἀγῶνισαν*, DEO ignoto altare erexerint. Quo factum est, ut, ne quem Deorum forte praetermitterent, complexi fuerint omnes sub uno titulo, *Deorum ignotorum, incertorumque*, ara illis posita cum hac inscriptione: *Diis Asiae, Europae & Lybiae, Diis ignotis & peregrinis.* *Vid. Andr. Sennertus Vir de hac Academia bene meritis, in scrutin. Relig. p. m. 51.* In aris autem suis Gentes Deum trinum ignorantes, initio nec pecora, nec illorum sanguinem, sed fruges, aliosque terrae fructus immolabant. Postea temporis progressu accidit, ut victimas litare coeperint. Atque inter has fuilla primum sacrificari coepta: ut *Ovidius* annotavit *lib. 15. Metamorph. vers. 112.*

Hostia sus meruisse mori, quia semina pando  
Eruerit rostro, spemque interceperit anni.  
Sane horrendum dictu illud est, quod & haec consuetudo tandem invaluerit, ut Dianae hominum sanguinem immolarint, quem abominandum immolandi ritum aegre ferentes Romani, Deam Dianam propter crudelitatem suam aliis Gentibus tradiderunt, atque adeo ei valedixerunt.

§. 3.  
Paucis jam dictis de Hominibus non Christianis, quos vulgo Ethnicos vocant, ad Livonos antiquis temporibus a vero DEO similiter averfos, me converto. Quamvis hi autem Livoni, sive, ut alii scribunt, Livones naturali sua

sua coecitate, atque mentis caligine decepti, & quasi fascinati, multos Deos Deasque habuerint, & cultu etiam religioso exceperint, iis tamen neque templa, neque aras extruxisse, aut erexisse, in quibus vel sacra peragere, vel victimas litare fuissent conati, nusquam legimus, adeo ut templorum talium, & ararum huiusmodi in Livonia nullo fere vestigium cernatur. Illud tamen non est inficiandum, Livonos olim sacros lucos sibi elegisse, in quibus Diis suis honorem divinum habuerunt, eosque adorarunt. Ipsos quoque lucos adeo sanctos aestimarunt, ut arborem ex iis caedere religioni duxerint. *Vid. Balth. Russovius in Chron. Liv. p. 2.* Idem asserit Caspar Hennenbergger de Prussis in *Chron. Pruss. p. 7.* Interea in lucis, sive, sylvis istis, neque templa, neque arae, nec columnae, nec idola fuerunt inventa. Et quemadmodum illud ipsum *Herodotus lib. 1. & Alexander ab Alexandro I. IV. Genial. dier. C. 17. p. 1092.* de Persis affirmant: sic quoque idem de Livonis valet. Quamvis vero Livones templis, arisque caruerint, Soli tamen, Lunae, tonitribus, fulguri, Ventisque, atque serpentibus sacra sua praestiterunt. Insuper Deos, Deasque singulares habuerunt, e. g. matrem, sive, Deam maris, quam piscatores, Deam agrorum, quam agricolae, Deam sylvarum, quam Venatores ferarum, Deam Viarum, quam Viatores, Deam hortorum, quam mulieres, & matres familias religiose invocant. *Vid. Paul Einhorn in Hist. Lettica p. m. 14. seqq.*

§. 4.  
Nec illud videtur praetermittendum, quod idem jam citatus Einhornius p. 17. de sexu feminino annotavit: feminas uterum praegnantem gestantes, & puerperas, Deam fortunae honore, cultuque divino affecisse, hancque Deam ex linguae suae genio *Qaima* / quae in puerperio laborantibus suppetias ferret, invocasse. A scopo forsitan non recessero, si affirmavero, Deam hanc fuisse Junonem Lucinam,



*Lucina*, cuius auxilium mulieres Infidelium suis in calamitatibus, & puerperii laboribus anxie imploravisse, legimus apud *Terentium in And. Act. 3. Sc. 1. p. m. 23.* his verbis:

Juno Lucina fer opem, serva me obsecro.

Res praeterea admiratione, & commiseratione potius est digna, quam idem saepe citatus *Einbornius p. 18* affert, se suis adhuc temporibus fama accepisse, quod Livones Deas invocaverint, hymnosque in Deorum honorem confecerint, in quibus Venatores & jaculatores Deam hortorum pecorumque sunt venerati. Addit idem *Einbornius*, se & hoc audivisse, Piscatores fuisse conquestos de Matre maris, sive, Dea maris, quae irata non amplius fortunare piscationes velit.

§. 5.

De sacrificiis Livonorum veterum, quae cum *Borussis, Samogitis, Lituanis, Rutenisque* communia habuerunt, etiam aliquid est afferendum, quod *Johannes Menecius* in Epistola quadam de sacrificiis, & idololatria Veterum *Borussorum, Livonum*, aliarumque vicinarum Gentium ad *Georgium Sabinum* Professore quondam & *Ducis Borussiae* Consiliarium scribit: Die Georgii sacrificium facere solent *Pergrubrio*, qui florum, plantarum, omniumque germinum DEUS creditur. Huic *Pergrubrio* sacrificant hoc modo: Sacrificulus, quem *Durschanten* appellant, tenet dextra obbam cerevisiae plenam, invocatoque Daemonii nomine, decantat illius laudes, tu (inquit) abigis hyemem, tu reducis amoenitatem Veris, per te agri & hortu virent, per te nemora & sylvae frondent. Hac cantilena finita, dentibus apprehendens obbam, ebibit cerevisiam nulla adhibita manu, ipsamque obbam ita mordicus epotam, retro supra caput jacet. Quae cum e terra sublata iterumque impleta est, omnes quotquot adsunt ex ea

ea bibunt ordine, atque in laudem *Pergrubii* hymnum canunt. Postea epulantur tota die, & choreas ducunt. Similiter mense facta solenne sacrificium pro gratiarum actione conficiunt, & Sacrificulus caprum mactaturus imponit victimae utramque manum, invocatque ordine Daemones, quos ipsi Deos esse credunt, videlicet: *Occopirnum*, Deum coeli & terrae: *Antrim-pum*, Deum maris: *Gardoeien*, Deum nautarum, qualis olim apud Romanos fuit *Portunus*: *Potrympum*, Deum fluviorum, ac fontium: *Piluitum*, Deum divitiarum, quem Latini *Plutium* vocant: *Pergrubrium*, Deum Veris: *Pargnum*, Deum tonitruum ac tempestatum: *Pocclum*, Deum inferni ac tenebrarum: *Poccollum*, Deum aeriorum Spirituum: *Putsaetum*, Deum qui sacros lucos tuetur: *Auscautum*, Deum incolumitatis & aegritudinis, *Marcoppolum*, Deum magnatum, & nobiliu: *Barstuccas*, quos Germani *Erdmenlen* hoc est, subterraneos vocant. His Daemonibus omnibus invocatis, quotquot adsunt in horreo, omnes simul extollunt caprum sublimemque tenent, quem postea sacrificulus ut victimam mactat, sanguinemque patina exceptum dispergit. Eadem Gentes colunt Spiritus quosdam visibiles, qui lingua Rutenica *Costa* Graeca *κόβιλα*, ubi haud dubie legendum *κόβαλοι*, Germanica *Eoboldi* vocantur. Hos Spiritus credunt habitare in occultis aedium locis, vel in congerie lignorum, nutriuntque eos laute omni ciborum genere, eo quod afferre soleant nutritoribus suis frumentum, ex alienis horreis furto ablatum. Hucusque *Menecius*. In eandem fere sententiam loquitur *Heinenberger loc. cit. pag. 8. seqq.*

§. 6.

De diebus festis, quos *Livones* veteres celebrarunt, orlo quoque, rerumque momentum postulat, ut paucis agam. Quemadmodum autem *Livoni* multos Deos, Deasque, quibus sacrificia facere consueverunt. eosque invocare, habuerunt: similiter atque iisdem unum alterumque diem festum instituerunt. De aliis Gentibus permultis, ipsisque Romanis scri-

B

ptores



ptores meminerunt, eos infinitas Diis, atque Deabus suis, ferias celebrasse. Quales vero *Livoni antiqui* dies festos agitarint, ad aures nostras haud multum pervenit. Conjectu non est difficile, eos, sicut reliquas Gentes, certos Diis & Deabus suis dies festos consecrassse. Sic constat, *Livonos per vetustos* mense Octobri animabus cibum porrexisse, iisque diem festum per quatuor hebdomadas, a die 29. Septembris ad diem 28. Octobris sanxisse, eosque dies adeo sacros duxisse, ut eos dies Deorum nominarent, in iisque parce laborarent, cum primis nullum frumentum extererent, rati, omne frumentum, quod iis diebus extritum esset, si seminatur, nullum incrementum esse caputurum. Hunc ipsum animarum diem festum & ab iis etiam, qui nomen suum Christo jam dederunt, clam celebratum audivi, cum abhinc nonnullis annis in patria mea viverem. Superest adhuc quidam dies festus satis abominandus, quem *Livoni* Mense Decembri tempore nocturno, saltando, exultando, cantando, vociferando, vorando atque potando celebrarunt, & domos circumeundo, omni nequitiarum generi indulgendo, atque sic heluonum, & ferme bestiarum instar noctem universam exegerunt. Et verosimile est, eos hunc detestandum diem festum a Gentibus impiis, Graecis aliisque mutuo accepisse, quos itidem mense Decembri COMO, Deo comestationum, lasciviae, proterviaeque ferias agitalse scriptores docent. Atque tantum de diebus festis *Livonorum Veterum*. Restaret adhuc, ut de natura, Republica, ritibus baptismi, nuptiarum & funerum, aliisque momenti *Livonorum* agerem, sed cum charta haec ea non capiat, & mihi ulterius progrediendum sit, peculiari quadam differtatione, DEO volente, omnia haec exponam.

## Cap II. De Religionis cultu, in Eccle-

sia Romana recepto.

§. I. CUM tanta Livonorum Veterum esset superstitio atque coecitas, Numen Sanctissimum & Summum illorum

miser-

miser cordia capti, salutem eorum procurari serio voluit. Et hinc gubernante DEI providentia factum est, ut An. 1158. vel ut *Arnoldus Lubecensis vult*, circa Annum 1160. imperante *Fridrico Barbarossa*, *Bremensium Mercatores*, tempestate jactati, urbemque *Vvisbi* errore praetervecti, atque appulsi, in continentem Livoniae ad Dunamundam, ubi hoc tempore egregium & permunitum castellum est, exscenderint. Et quamvis Bremenses a Livonis initio male exciperentur, ac nonnulli ab iisdem interficerentur, pace tamen officiis & commerciis conciliata, & jurejurando utrinque confirmata, merces cum mercibus commutare coeperunt, eosque sibi devincire. Deinde moderante DEO, incolae Livoniae nihil mali suspicantes, Bremensibus potestatem dederunt non modo negotiandi ad aliquot milliaria, sed & domicilii aedificandi iisdem copiam fecerunt. Bremenses sibi omnino gratulantes de tanta DEI gratia, in monte quodam ad Dunam Castellum firmum, quod vocabatur *urful*, & paulo post Castrum *Dalen* extruxerunt. Haec priora Castra Christianorum in Livonia fuerunt. Vid. *Generosissimus Dominus Caspar von Ceumern in Theatrido Liv. Balt. Russov. in Chron. Liv. Part. I. p. 5.* Ut autem DEI Omnipotentis non obliviscerentur pro tantis insignibus exhibitis beneficiis, Eique rectius inservire possent, in loco quodam ad Dunam, ut nonnulli putant, templum, sive, aedem DEI nomine *Kirchholm* aedificandam curarunt. Quo in loco etiamnum templum eodem nomine reperitur. Veteris vero templi, ut & duorum Castrorum rudera & hodie videntur. Consentire tamen non possum cum *D. Matthaeo Dressero*, qui *Part. 3. Isag. Hist.* scribit, Livoniam An. 1186. a vicinis populis occupatam, & vi ad Christianam Religionem traductam esse. Siquidem consentientibus accuratissimis Chronologis, An. 1158. vel circa annum 1160. Livonia est inventa, ab eoque statim tempore sensim in pio DEI cultu informata. Scio quidem, esse nonnullos, qui seculo jam nono Livoniam inventam, & conver-



sam esse, atque ab *Erico Sveonum Rege*, Coenobium quoddam prope Urbem Revaliam extructum putant, illudque ex Analibus probatum reddunt, sed cum hoc de argumento Celeberrimi Chronologi taceant, cogor annum commemoratum 1158. retinere, eundemque statuere.

§. 2. Posteaquam igitur *Bremenses* in Livonia habitare coeperunt, incolis illius terrae magis magisque sibi devinctis, ad aliquod tempus in tuto sunt versati. Et quo major Bremensibus cum Livonis esset consuetudo, Bremam profecti, ab eaque urbe mercibus aliis instructi, ad Livonos cum aliis Germanis Mercatoribus redierunt, atque ab iis comiter sunt habitati. Accidit autem DEO sic moderante, ut cum Bremensibus Symmysta quidam, Vir alioquin doctus, nomine *Meinardus* Monachus, oriundus ex oppido Segeberge, in Livoniam perveniret.

§. 3. In hoc *Meinardo* & summa comitas, & oris suavitas erat, unde omnium hominum & oculos & favorem in se convertebat. Omnem itaque lapidem movebat, ut Gentibus Livonicis a vero DEO alienis verbum DEI annuntiaret, easque ad DEUM traduceret. DEUS laboribus ejus, & omnibus conatibus, quos in honorem Numinis susceperat, & Livonorum salutem, adeo benigne annuebat, ut multae animae lucrifерent. Erat e regione Castelli *Uyful* quidam Vir dives, potens simul & magnae auctoritatis, cui nomen erat *Cobbe*. Hic & multi ex ejus amicis, Christo nomen dantes, a *Meinardo* sacro fonte abluti in gratiam cum DEO redibant. Rurnore autem ad *Lituanos*, *Russos*, *Esthones*, *Curones* aliosque perlato, *Cobbe* & multos illius amicos Christianos esse factos, armis sumptis, Christianis sese opposuerunt. Quo ipso fiebat, ut *Meinardus* cum dicto *Cobbe*, aliisque Christianis Romam proficisceretur. Erat eo tempore Pontifex *Alexander III.* qui rebus Livonicis bene exploratis, *Meinardum* Episcopum Livoniae Anno 1170. constituerebat. Sedes autem Episcopalis erat eo in loco, quo jam

jam urbs Riga est extructa. Fuit hic *Meinardus* Episcopus 23. annos, & Anno 1193. diem supremum obiit.

§. 4. *Meinardo* mortuo, in ejus locum suffectus est *Bartholdus*, Brema Livonorum rogatu in Livoniam missus. Hic *Bartholdus* secundus Livoniae Episcopus, An. 1190. Urbem *Rigam* primus aedificare coepit, sed ab *Esthonibus* opus inceptum inique ferentibus fuit interfectus, annis XI. in sede Episcopali confectis Leg. Dominus a *Ceumern*, *Frid. Menii Prodrum. Liv. p. 4.*

§. 5. *Bartholdo* occiso, Livoni Christiani dolorem fatis magnum ceperunt, & ad Archiepiscopum Bremensem miserunt, aliumque Episcopum exorarunt. Erat vero eo tempore Bremae Vir quidam sincerus, cujus nomen *Albertus* ex familia *Burghveden*. Hic *Albertus* tertius Livoniae Episcopus, An. 1240. Romae a Pontifice *Innocentio III.* confirmatus, ab eoque Pontifice ordo Equestris, quem vocabant *Crucigerorum* & *Templariorum*, ut *Alberto* contra Barbaros subsidio veniret, fundatus fuit. De hoc *Alberto* paucis annotandum, eum An. 1200. Urbem *Rigam* magis excolendam & instaurandam, multa templa, monasteria, templum *Cathedrale Rigense*, & Coenobium aliquod ad *Dunam* mundam extruenda, monetam Privilegiis *Henrici Imperatoris Romani*, eundendam curavisse.

§. 6. *Alberto* rebus humanis erepto, quartus Livoniae Episcopus a *Gregorio IX.* constitutus fuit *Nicolaus*. *Nicolaus* defuncto, primus Livoniae Archiepiscopus ab *Innocentio IV.* creatus est *Albertus*, & ultimus in Archiepiscoporum ordine exstitit *Wilhelmus Marchio Brandenburgicus*, in quo haec dignitas defecit. Si quis omnium Antistitum Livoniae nomina desiderat, adeat *Generos. Dn. a Ceumern*. Atque sic per Episcopos initio, & deinceps per Archiepiscopos Livonia univcrsa ad Religionem Christianam informata, & templis passim extructis aucta, doctrina Ecclesiae Romanae in Livonia a Seculo XII. ad sextum decimum usque floruit.



### Caput III. De renovato & instaurato

per D. Lutherum cultu.

§. 1. **Q**uanta Livonorum Veterum superstitio fuerit, ex iis, quae haftenus dixi, satis patet. Eo enim tempore, quo Religionis insigniebantur, nec vera Dei cognitio, nec literae quicquam ibi valebant. Homo autem sine Numinis cultu, & sine literis satis est miser. Id eleganter & erudite expresit *Balibasar Gratiannus* in libro, qui inscribitur *L'homme de Cour*, ex interpretatione Ameloni reculo, ubi *Maxime* 4. p. m. 4. in hanc sententiam loquitur: *L'homme, qui n'est rien, & est le monde en tenebres*, hoc est, homo, qui literarum expertus est, mundus est in tenebris. Et *Arabum* hoc est proverbium: non est orphanus, cujus obiit pater, sed orphanus est, qui scientiam non habet, & eruditionem. Huc quoque spectant verba *Senecae* in *pistola* 78. p. m. 403. ita dicentis: unus dies hominum eruditorum plus patet, quam imperiti longissima aetas. Et *Ep.* 8. p. m. 429. Optum sine literis mors est, & vivi hominis sepultura. Omnia haec in antiquos Livonos apprimè conveniunt, & vere dicuntur. Posteaquam vero sacris initiati sunt, multa cum nationis suae laude literis quoque paulatim operam navare coeperunt, neque ab hoc instituto ad hodiernum usque diem destiterunt.

§. 2. Ac ita quidem se gesserunt prioribus seculis, quibus Romanae Ecclesiae se addixerant. Cum vero regnante *Magistro Provinciali VVoltero von Plettenberg* Anno Christi 522. 1523. 1524. lux instauratae doctrinae urbi *Rigensi* affulsit, verbo divino literisque majori conatu & industria incubuerunt. Atque ut a ritibus Ecclesiae Romanae discessionem facerent, bellum simulacris indixerunt in tribus Urbibus *Rigae*, *Revaliae*, & *Dorpati*, & sic imagines, & statuas passim confregerunt, & Religionem Evangelicam Lutheranam solenniter introduxerunt.

§. 3. Atque haec doctrina tantum Deo adspirante incrementum cepit, ut multi ex ordine Equestri, & cum eodem multi alii eandem amplecterentur, pro eaque vitam amittere, & sanguinem profundere vellent. Concionatores Romanos ritus professi, his observatis, *Archiepiscopum Casparum von Linden* concitarunt, ut illos contra

Lutheri

Lutheri sectatores tueretur. Hic ut illorum petitis locum daret, *Episcopum Dorpatensem Johannem Blanchenseld* adiutorem sibi elegit. *Rigenses* vero hujus ardore circa Religionis negotium, & libertatem satis cognito, atque perspecto, ei obsequium praestare recusarunt. *Vid. Menius* pag. m. 13.

§. 4. Quamvis autem Evangelici hinc inde vexarentur bellisque opprimerentur, Dei tamen ope suffulti doctrinam Evangelicam per universam Livoniam propagarunt. Nec defuerunt Viri & fama & eruditione clari, qui ex exteris regionibus in Livoniam profecti, egregiam religioni Evangelico-Lutheranae provehendae operam dederunt. Inter reliquos Viros doctos eminet *Dionysius Fabri*, Pomerania oriundus, qui ob inopiam Scholarum in Livonia circa Annum 1538: *Livonicos Processus Juris* quinque libris constantes in lucem emisit. Theologorum nomina & merita, qui circa illud tempus flourerunt, propter Chartae hujus angustias silentio praetereo. Non tamen hic oblivisci possum Viri de re sacra bene meriti, & pastores olim in Livonia *Felinensis Roetgeri*, *Beckeri*. Atavi quondam mei Charissimi, qui inter primos *Rigae* in templo S. Mariae Magdalenae Monachis Lutheri doctrinam aperuit, & Catechismum explicuit, & praeterea unum alterumque scriptum promulgavit. Ut nihil jam dicam de *Johanne Beckeri* Ministro Ecclesiae quondam *Rigae* proavo meo amantissimo, quoniam a jactantia longissime absom. Hinc ne verbum quidem addo de agnato meo, qui in Livonia functus est munere *Directoris Justitiae*, cujus monumentum superest *Rigae* in Ecclesia Cathedrali conspiciendum. Neque illud est omitterendum, sub *Regibus Sveciae & Poloniae* Religionem Evangelicam prospero successu fuisse promotam, atque amplificatam. Legimus quidem, Anno 1582. pace inter Polonos & Moscovitas constituta, *Stephanum Regem Poloniae* passim in Livonia mutationem auspiciatum, ac Sacerdotes Ignatianos Dorpatum, VVendam, & kokenhusiam duxisse, atque a *Rigenfibus* Templum Cathedrale tradendum postulasse, sed tantum aedem S. Jacobi longam post moram obrinuisse, & Anno 1583. primum Episcopum *Johannem Patriitium VVendam* ablegatum, ibique summum Capitulum, & Dorpati sedem Praepositi, ac Patrum S. J. Collegium constitutum esse. Sed deinde sub *Regibus Sveonum* major indies doctrinae Evangelicae vis & libertas fuit.


§. 5. Cum



§. 5. Cum enim GUSTAVUS ADOLPHUS Svecorum Rex Anno 1621. d. 1. Augusti Urbem Rigam, & deinceps universam Livoniam in suam potestatem redegisset, magnanimus Rex Lutheri Religionem tuendam & stabiliendam sedulo suscepit. Videns autem, Livoniam scholis non multis instructam, & secum animo pervolvens, scholas Reipublicae seminaria esse, nihil adeo habuit in votis, quam ut scholae in Urbibus, oppidisque fundarentur, bonisque Praeceptoribus ornarentur. Quem in finem Dorpati cura Regis benignissimi, schola oppidana, schola itidem vulgaris, & Privilegiis Regiis donata, tribusque Collegis praedita, egregium insuper Gymnasium, quod octo Professoribus constaret, condita fuerunt. Quoniam vero Rex GUSTAVUS ADOLPHUS in eo semper innitebatur, ut Livonia quovis tempore floreret, opera ejus factum est, ut Anno 1632. d. 15. Octobris Gymnasium illud, sedecim cooptatis Professoribus, nomine & titulo *Academiae*, sive, ut loquuntur, *Universitatis* inauguraretur, iisdemque Privilegiis, quibus *Academia Upsaliensis*, ornaretur. Et quanquam haec *Dorpatensis Academia* Anno 1656. bello Moscovitico fuit vastata, An. tamen 1690. sub Auspiciis CAROLI XI. Svecorum Regis quondam Gloriosissimi magnifice instaurata, & An. 1699. d. 28. Augusti, uti per literas accepi, *Pernaviam* translata est.

§. 6. Ceterum quantus Religionis Evangelicae defensor fuerit CAROLUS XI. restantur illius Constitutiones Ecclesiasticae, paucis abhinc annis promulgatae, scholae per universam Livoniam in omnibus Urbibus, Oppidis, pagisque, Regiis sumptibus fundatae & conservatae, Biblia Lettica itidem sumptibus Regiis non solum procurata, sed etiam inusitata quadam munificentia *Ecclesiis Livonicis & Curlandicis* donata. Quam accurate haec Biblia, labore atque opera indefessa *Johannis Fischeri Theol. Doctoris & Generalis Livoniae Antistitis*, cui Livonia ob egregia illius merita plurimum debet, & ego ipse pro innumeris in me, & in patria mea fere per decennium, & hic per quadriennium, collatis beneficiis, debeo, ad fontes Hebraeos Graecosque expressa & reddita sint, nostras *Kortholtius* in scripto quodam *de Variis Scripturae Editionibus* insignitet demonstravit. *Libri*, quos vocamus, *Symbolici* tanti sunt, & tanti in universo regno Svecico aestimantur, ut sacris ordinibus iniciandi & inaugurandi, in eos fidem dare & jurare per sancte teneantur. Nec possum silentio praeterire *Lyceum Regium Caroli XI. pietate fundatum An. 1675. in urbe Riga*. Quam indulgentissime *Carolus XI.* id fovit, & *Carolus XII.* quem Deus semper incolumem clementer servet, etiamnum foveat, & quanti jam ex eodem Lyceo Viri prodierint, loquantur, qui compertum habent. Nec quisquam vero dubitat, quin, si Deus id servaverit, fructus in omnem posteritatem hereditaturus. Quanta industria, & labore perpetuo *Johannes Uppendorff* per 20. annos cum dignitate Rectoris eidem praefuerit, & deinceps, atque ante biennium in *Academia Dorpatensi Prof. Publ. Orient.* constitutus, paucis ibi hebdomadibus confectis, vitam cum morte commutavit. Praeceptor ante meus per quadriennium optime meritis, cui post Deum multum in acceptis fero, non est cur multis dicam. Reddat nobis Deus Viri ejus similem in *M. Adriano Preussmann*/ Amico meo & Commilitone quondam amantissimo, ut sarciat jacturam, quam fecimus in *Uppendorffio*. Sic Deum precatus, & gratias Eidem persolutis, laborem hunc in praesens finio, laetusque concludo.







Hist. Russ.  
6, provinc.  
Livoniae.



